

Fung Saenq Hawj Siuj Baengzyoux Gizgyae ndeu



Lij Mingz doengzhag:

Mwngz ndei!

Gou gig angq ngoenzneix sij saenq hawj mwngz, mwngz yawj daengz fung saenq neix seiz, itdingh roxnyinh gig geizheih: Vih maz sij saenq hawj gou ne? Baihlaj dingq gou gangj, mwngz couh rox vih gijmaz saeh lo.

Gou dwg boux lwgnyez hailangh daihueng coengmingz dwggayez ndeu, gou gyaez ciengqgo, gyaez vehveh, gyaez

给远方小朋友的一封信

贵港市覃塘区蒙公乡凌寺小学五(2)班 覃彩虹

bang vunz, daihgya cungj gyaez caeuq gou guhcaemz.

Hagdangz dou seizneix cingq gawjhengz aen hozdung caeuq gizgyae siuj baengzyoux “fwngz gaem fwngz”, gojyij doenggyaq gak cungj fuengfap roxnaj siuj hagseng ndawsingz lajmbanj Baihsae Digih, caemhcai q gapbaenz baengzyoux ndei, gojyij doenggyaq sij saenq, hwnjvangj daengj fuengfap daeuj gyauhliuz hagsib sinhdwz, saeh mizyinx daengj. Ngoenzneix gou sij saenq hawj mwngz, couhdwz aen muzdiz neix. Gou maqmuengh raeuz baenz baengzyoux ndei le, daengzcog couh gojyij dox bangcoh dox gvansim, gou miz maz mbouj

rox mwngz gojyij son gou, mwngz miz maz gunnanz gou couh bang mwngz, neix dwg geijlai ndei ha!

Raeuz yienznaeuz gek youq mbiengj mbwn ndeu, danhseih raeuz doengz majhung youq baihlaj aen mbwnlamz ndeu. Gou maqmuengh caeuq mwngz “fwngz gaem fwngz” baenz baengzyoux ndei, doxcaez hagsib, doxcaez cinbu, doxcaez majhung, mwngz gangj ndei lwi?

Doeklaeng hoh mwngz hagsib cinbu, ndangdaej ndei!

Baengzyoux mwngz:

Cinz Caijhungz

2014. 12. 25

(指导老师:郑振常)

Cinz Yenz Haengj Bang Vunz

助人为乐的覃媛

环江思恩镇清潭小学 罗晶晶

Cinz Yenz dwg doengzhag ban gou, de mbouj suenq sang, byoemgyaeuj youh ndaem youh noengq, doiq da luenzlulu, cinglingz youh ndeigyaez, de gig haengj bang vunz.

Miz ngoenz ndeu, lwnz daengz siujcuq dou baet dieg. Ngoenzhaenx cingq doek fwn iq, gou caeuq geij boux doengzhag youq ndaw fwn baet mbawfaex nanwt haenx, miz di dwgrengz. Gou mbouj miz liengj, byoemgyaeuj caeuq buhvaq dumz liux lo. Cinz Yenz raen lo, couh byaij daengz dangnaj gou, gvansim dwk gangj: “Siujcingh, buhvaq mwngz cungj dumz lo, gou daeuj

bang mwngz baet, dou vaiqdi baet nyapnyaj seuq bae.” Gangj sat, de couh dawz sauqbaet baet hwnjdaej. Miz de bang gou baet, dieg haemq vaiq couh baet seuq lo.

Lij miz baez ndeu haetromh, gou caeuq Cinz Yenz daeujdaengz hagdangz, ngamq haeuj bakdou hagdangz, couh yawjraen gwnz cauhsangz miz haujlai vunz humx youq giz ndeu, mbouj rox fatseng gijmaz saeh. Dou song boux couh buet gvaqbae yawj, yienzlaiz dwg boux doengzhag iq ndeu deng laemx, lwgdin ok lwed lo. Cinz Yenz sikhaek daj ndaw daehsaw dawz ok bau ceij ndeu, gangj:



“Daegnuengx, hawj gou yawjyawj.” De bang doengzhag iq uet lwed seuq le, gipmuengz aemq de bae yihiyen. Lwgdin boux doengzhag iq dwk yw bau ndei le, Cinz Yenz youh aemq doengzhag iq ma hagdangz, de baeg ndaej ok hanh lo, de hix mbouj gangj gijmaz.

Cinz Yenz couhdwz yienghneix haengj bang vunz, ndawsim gou gig boiqfuk de, gou aeu yiengq de hagsib.

(指导教师:韦志略)

Duzlingz iq caeuq daxmeh youq ndaw ndoengfaex gwnz ndoi, ngoenznaengz ra gwn guhcaemz, swxyouz swxcailh.

Ngoenz ndeu, duzlingz iq cam daxmeh: “Daxmeh, aenndoeng miz bien lwi?” Daxmeh naeuz: “Dinndoi couhdwz bien ndoih lo.” Duzlingz iq youh cam: “Rog ndoeng baenzlawz yiengh ne?” Daxmeh naeuz: “Laj ndoi, bouxvunz hai naz caux reih, youq ndaw naz ndaw reih ndaem le haulaij doenghgo. Seizneix, haeuxyangz gaenq maj baenz lo, aen’ aen bongqbebe, youh diemz youh rang ne.”

Duzlingz iq caengz ndaej gwn gvaq haeuxyangz, de cam: “Haeuxyangz dwg baenzlawz yiengh ha? Lumj mak-dauz roxnaeuz makgyoi?” Daxmeh naeuz: “Cungj mbouj lumj, go de daengjsoh, lumj song sam duz lingz sang, giet aen youq bangx gyang. Aen haeuxyangz miz byak suek dwk, gwnz dingj lij miz nyaep mumh ndeu.” “Haeuxyangz geijlai saenzgeiz ha!” Duzlingz iq naemj ha naemj, de baenzlawz siengj hix siengj mbouj ok haeuxyangz dauqdaej baenzlawz rang baenzlawz diemz. De ndwnj gaemz myaiz ndeu, ngaeq daxmeh daiq de

Duzlingz Iq Mbaet Haeuxyangz

小猴子摘玉米

bae mbaet haeuxyangz. Daxmeh mbouj miz banhfap, cijndei han lo, naeuz: “Bae caemh ndaej, hoeng, itdingh aeu dingq gangj, cij hawj mbaet aen ndeu, mbaet le couh buet dauqma, mboujne hawj vunz gaeb bae couh dai lo.”

Banhaemh duzlingz iq gaen daxmeh roengz ndoi, daeujdaengz henz reih haeuxyangz, swnh bouxvunz baema gwn caeuz caengz dauq, cung hwnjbae duz mbaet aen haeuxyangz ndeu, couh sikhaek buet dauqma gwnz ndoi.

Duzlingz iq gwn haeuxyangz. A, youh rang youh diemz! De gwn sat le lij siengj caiq gwn dem.

Haemh neix songde youh daeuj mbaet haeuxyangz lo, lij ciuqyiengh mbouj miz saek boux vunz. Duzlingz iq ndawsim gag naemj: “Daxmeh gag lau dai, gizlawz miz vunz ha? Gou aeu lai mbaet di baema cij ndaej.”

Duzlingz iq yaengx fwngz gvaz

mbaet aen haeuxyangz ndeu, youh yaengx fwngz swix mbaet aen haeuxyangz ndeu. De yaek mbaet aen daihsam, hoeng, fwngz mbouj ndaej hoengq lo, baenzlawz guh ha? De dawz haeuxyangz geb youq lajeiq, youh caiq yaengx fwngz bae mbaet haeuxyangz. Hoeng, de baez yaengx fwngz, aen haeuxyangz lajeiq couh “bug” sing ndeu doek gwnz namh bae. Hoeng, duzlingz iq cij goq yaengx fwngz mbaet, mbouj goq aen doek namh. Yienghneix, de mbaet le youh geb, geb le youh mbaet……

Daxmeh mbaet ndaej aen haeuxyangz ndeu couh buet. De buet ha buet ha, mbouj raen duzlingz iq, laihsaen de gaenq baema ranz lo. Daxmeh daengz ranz le, lij mbouj raen duzlingz iq, couh gipmuengz buet dauqma yawj.

Daxmeh daengz henz reih baez yawj, cij raen duzlingz iq lij



haenqrengz mbaet haeuxyangz, baenz benq reih gwnz namh cungj dwg haeuxyangz doek.

Cingqngamj seizneix, miz vunz daeuj lo. Daxmeh simgip dangq feiz remj, swenjauyau hwnjdaej. Duzlingz iq baez dingq, gaem aen haeuxyangz ndaw fwngz, vaiqvatz couh buet hwnj ndoi.

Duzlingz iq sai le baenz lai seizgan, mbaet baenz lai haeuxyangz, hoeng, mbouj rox rom ndei cang ndei, dauqdaej hix cij ndaej aen haeuxyangz ndeu dauqma ranz, geijlai hojsik ha!

(Ganh Sozywnz/甘说文)